

**Naul nga
PITA
Muli Womue
Batu nale nga mivsivseni lut
nga parmeteni naul ngel
puto suri**

Pita oli naul ngel van ji kalesia nir nga marlik sarrsarr mirpe jinibb neturvitan nir (strenja) rengen lat sopor nga marwera Pontas, Galesia, Kapatosia, Esia, ko Bitinia (ko lelingenok iok p̄etp̄eti nir arwera vajin Teki e). Ko lartul nga marlik ie arok-sij tevi kalesia nir, suri sete armerreni kalesia. Ko Pita owra nir parir ko wor, suri norongen nga m̄isij ngok orongwos puloli nosurien ser p̄iterter p̄irres (1:6,7). Ko owra Kristo kele ornge esij daron nga m̄ilik iel ngatan, ko mian ko emij suri kerr, ko mian ko emaur luwi kele, ko mian ko nabong sapon ni pia-luwi vini ko p̄itkai jinibb sen nir. Ngok nir partur p̄iterter ko wor rengen norongen nga m̄isij, ko parosuri Kristo p̄iterter.

Pita owra erres tevi nir

¹ Inu Pita nuvi aposol se Iesu Kristo, nuwra erres tevi kami jinibb se Atua nga kamlik lat sarrsarr mirpe jinibb neturvitan nir, re Pontas, Galesia, Kapatosia, Esia, ko Bitinia. ² Atua Tata se kerr otobbtobbue kami tuwi ko pa nga kapivi jinibb sen, ko Nem̄in sen ololi kamon

erres. Kamosuri Iesu Kristo, ko drran ejivle tweni nololien se kami. Ngel evi loten suk, nga tetajer Atua pok-wilwil se kami renge nalol nga mĩrres, ko tetajer pĩlŋgi demat puto tevi kami.

Mauren nga mĩrres oto wor renge melrin

³ Erres nga rrapwera erres temijpal tevi Atua nga mivi Atua ko Tata se Numal se kerr Iesu Kristo. Atua ngok ok-rongpote kerr, ko renge murrun ngok, ololi erpe kerr rramĩiak luwi kele, rramtor sweri mauren nga mimerr. Ko ngok eplari suri nga muloli Iesu Kristo mimaur luwi kele renge mijen. Ngok puloli norrorrmien se kerr pĩterter nga puto tetajer. ⁴ Ko rramrong-wose nga Atua elngi merrenien nga milep oto metmet renge melrin terai jinibb sen nir. Nanu ngok sete orongwose pĩsij rreknga pumutmut rreknga pijijki, ejki. Atua emetmet lilane re melrin. ⁵ Nanu nga mĩrres ngok evi se kerr nga rramosuri Atua. Ko suri nosurien se kerr nga muto mĩterter renge Atua, Atua orrul totkoni kerr pianan pijpari nga pĩlai mauren tevi kerr, ko pia-viseni vajin nanu jijle nir renge nabong nga vitu.

⁶ Kañir lenglengen suri iok, ewretun poro lelingen wolok ko pa, kami kamrunge esij wor suri nanu karkar nga marini parrowrrowe kami.

⁷ Nanu ngok nir arivi nga parrowrrowe kami ko parlesi nga nosurien se kami evi weretunen. Netkur ne sir nga mĩkipkañil, arolngi re nabb, mian ko emetet erres vajin.^A Ko norongen nga

^A **1:7** Erpe iel, Pita ospe gol, ko namlingi netkur ne sir, nga puloli mining ne nale se Pita piplari piñerer.

m̃isij se kami lelingenok erpe nabb ngok, ko orongwos puloli nosurien se kami pimetet p̃irres. Ko netkur ne sir puto beblen kobbong, mian ko p̃isij; ko nosurien se kami puloli Atua pia-susi nise kami pian mare renge nabong nga Iesu Kristo pia-luwi vini ren. ⁸ Kammerreni lenglengen Iesu Kristo, ko setewor kamlesi nabong san. Ko nosurien se kami oto eterter rengen, ko sete nale san orongwose p̃iwer jipari neiren nga m̃irres se kami nga muto m̃iterter renge Atua. ⁹ Ngok kapjipari sev nga nosurien se kami murrormi nga kaptor sweri ko, nga Atua p̃ilai se mauren se kami.

¹⁰ Propet ne tuwi kele nir arok-pejpej sel nga Atua p̃imajing ren nga piwilwil se jinibb ren. Ko arp̃elak elep nga parlesi; ko sete arlesi, ko arwera pia-pelari nabong san. Ko kerr le vajin rramalesi. ¹¹ Propet nen nir arloli lesi, arpejpej sel sev, ko renge daron sev nga nanu ngok nir parremali ren, suri Nem̃in se Kristo nga muto renger ok-juji malum nanu ngok nir. Ok-werai tweni tevir nga Kristo purnge p̃isij renge niben, ko vitunen Atua p̃ilai nais nga mian mare temijpal tevi renge melrin. ¹² Atua eviseni tevi propet nir nga nale weretunen ngok sete evi rragrrag se nir, ko evi se kerr nga rrammaur lelingenok. Ko nale weretunen ngok errmali pa ji kerr osuw.

Nir nga marwerai tweni vajin nosp̃en nga m̃irres renge derteren se Nem̃in On nga Atua mukoni renge melrin vini, nir ngok ko arlai eplari. Ko nale weretunen ngok, anglo kele nir arser rrale nga parlesi wose.

Kaptori murrun ko mauren nga muon

¹³ Re iok, kami kaploli norrorrmien se kami puto metmet ko piñerer ãirres. Ko kami kaplingi norrorrmien se kami puto tetajer reнге Atua nga ni piwilwil se kami reнге nolon nga mñirres daron nga Iesu Kristo pia-rremali ren. ¹⁴ Kaposuri Atua. Sete kapmarong nanu nga kammerreni nir ne tuwi daron nga kamlengleng vane e, parevei murru kami. ¹⁵ Atua ngok nga mok-verus kami on, ko owokwok erres. Ko reнге murrun ngok, kami kele kapon ko kapwokwok ãirres. ¹⁶ Suri Naul On owra ‘Kami kapon ko wor ko kapwokwok ãirres, pirpe inu nuon ko nuwokwok erres.’ ¹⁷ Ko kamok-lot van jin, ko kamveruse kamwera, Tata. Ko kaposuri kele ko wor ni ãirres re mauren se kami iel ngatan, suri Atua puwra suri lat nga puto suri tevi jinibb jijle re norrngov sansan ngok kobbong, suri murrun nga marloli. ¹⁸ Ko kami kamrongwos pae sev nga Atua mñilai nga puwli tweni kami e nga puloli kapiel sisarow reнге murrun nga mñisij nga kamtor sweri ji apu se kami nir ne tuwi. Ko sete elai nanu nga pian ko ãisij, erpe silva rreknga gol, ejki. ¹⁹ Elai drra Iesu Kristo natun mawos, nga mñiseser reнге nai pelaot, nga puwli tweni kerr. Drra ngok erpe drra sipsip san nga nabil san mijki rres ren. Ko reнге no Atua, drra ngok se Kristo erres ãelak. ²⁰ Tuwi jer pa daron nga Atua setewor mñilngi iel ngatan, ko otobbtobbu tweni pae Kristo nga pia-majing nanu ngok nir. Ko lelingenok nga sete mia-periv iel ngatan pusuw, Atua eviseni pa ni nga pia-lai mauren

tevi kerr. ²¹ Ko suri nanu nga Atua muloli ngok, kami kamini pa kamosuri Atua nga muloli Kristo emaur luwi kele renge mijen ko mĩlai nais nga mian mare renge melrin. Ko kamosuri eterter ko kamlingi norrorrmien se kami oto malum eterter renge Atua. ²² Kamloli mauren se kami owokwok pa osuw re no Atua suri kamosuri pa nale weretunen osuw, ko orongwose kapmerreni tasi kami renge murrun nga musorsan mĩrres. Ko kapmerrmerreni lululweni kami tevi nolo kami p̃etp̃eti vajin. ²³ Kamĩak luwi pa, ko kamtor sweri mauren nga mimerr. Ko mauren ngok sete eplari renge jelangin nga mia-mutmut; eplari renge jelangin nga sete mia-mutmut nabong sapon. Jelangin ngok evi nale se Atua, nga mimaaur ko sete mia-jijki nabong san. ²⁴ Naul On owra ‘Kerr rramirpe mösmös kobbong, ko joro kerr nga mĩrres p̃elak erpe bbong nevngu mösmös ko. Mösmös orongwose pukur, ko nevngun kele pian ko parvitvitan. ²⁵ Ko nale se ma Atua puto tetajer.’ Ko nale ngok evi nale ne nosp̃en nga mĩrres ngok nga marwerai tweni pa osuw tevi kami.

2

Murru kami pivi ko wor weretunen jerjer

¹ Niko, kapsuw vajin re kamok-loli murrun nga mĩsij. Sete kaplolar, ko sete kapkerkeris, ko sete kapsilveni nolo kami. Sete nolo kami pileplep, ko sete kaprij p̃isij tevi jinibb m̃inij. ² Kami kapirpe bipi nga mia-iak nga mimrreni lenglengen pusur; ko daron nga musus vajin mian ko jin eterter

temijpal. Ko kami kele kapirpok, kaplai nanen nga puwngani nemĩ kami nga puloli Atua pialai mauren tevi kami rengen. ³ Suri nale ne Naul On owra ‘Kami kamrrowrrow pae murrun se Numal, ko kamlesi wose lat nga mĩrres muto suri.’

Burtur nga mimaur

⁴ Kapini ko wor rraptur tevi Numal se kerr. Ni erpe burtur nga mimaur. Jinibb ne majingen arwirr tweni ko pa osuw, ko Atua otobbobbue pa ni osuw. Ko renge no Atua, ni erres p̃elak. ⁵ Kami kele kapirpe burtur nga mimaur nga Atua puloli kapirpe naim ne Nemĩn sen nga mimaur. Ko renge naim sen ngok, kami kapirpe jinibb sulsulen nga muon se Atua, nga mok-lai merrenien van jin. Merrenien nen erpe nga kamlai norrrormien se kami van ji Atua. Ko ni eir nga putor sweri merrenien nga mirpok, suri kamkorti tevi Iesu Kristo daron nga kamlai e. ⁶ Suri Naul On owra ‘Kaplesi, inu nususture burtur nga mĩrres p̃elak renge botwen nga Saeon. Evi burtur nga mĩrres p̃elak ne naim. Ko si nga muosuri, ko sete nolon pijebreni.’ ⁷ Tevi kami nga kamosuri, burtur ngok erres p̃elak. Ko tevi nir nga sete marosuri, erpe nga Naul On muwra ‘Burtur ngok nga jinibb ne naim marwirr tweni pa musuw, artaol lengleng nga evini kele evi burtur nga mĩrres p̃elak vajin.’ ⁸ Ko Naul On owrai kele ‘Ngok evi burtur nga puloli jinibb parvitan rengen.’ Jinibb ngok nir arvitan ren suri sete arosuri nale se Atua, ko ngok evi pa norrngov nga Atua muloli pa musuw tevir. ⁹ Ko

kami ma Atua otobbtobbu kami pa nga kapivi metka sen. Kamirpe jinibb sulsulen se Numal, kamivi jinibb on se Atua. Atua ololi erpok nga puloli kapwerai tweni majingen nga m̄irres sen. Everus tweni pa kami renge nemalik nga kapini renge moron nga m̄irres sen. ¹⁰ Womu kamiel ngasue Atua, ko lelingenok kamivi vajin jinibb se Atua. Womu sete kamtor sweri nga Atua purrorrmi kami, ko lelingenok kamtor sweri vajin nga Atua orrorrmi kami.

Rramivi jinibb ne majingen se Atua

¹¹ Selek nir, kamlik iel ngatan erpe jinibb neturvitan kobbong nga siser mijkie. Ko nuwrai eterter tevi kami nga sete kaploli murrun nga marsij nga norrorrmien se kami mimrreni. Murrun ngok nir artere kami nga pulokloksi mauren se kami. ¹² Ko jinibb ne vare nir ar̄pelak nga partor sweri nga kami kamivi jinibb nga kamtor otvi nale nesesreien. Ko kami kaploli lilane wor murru kami pusorsan p̄irres re no nir, puloli parlesi majingen nga m̄irres se kami. Ko vitunen daron nga Atua pia-wera suri lat nga puto suri tevi jinibb nir renge nabong nga vitu, ko para-susi nise Atua van mare suri majingen nga m̄irres se kami.

¹³ Suri kamivi jinibb se Numal se kerr, ko kaposuri ko wor nir nga marivi numal gavman nga jinibb mususture ko ni nga mivi batbatu numal gavman, nga mimetmete jinibb totoklai nir. ¹⁴ Ko kami kaposuri gavman nga batu numal gavman mukonir nga parvirrali jinibb nga martor otvi nale nesesreien, ko parsurövi

kele nir nga marvijuri murrun nga musorsan m̄irres. ¹⁵ Ko ngok evi nanu san nga Atua mimrreni, nga re murrun nga musorsan se kami, kapwer ore nale nga marlengleng se jinibb nir nga norrorrmien ser mijkie. ¹⁶ Kamivi jinibb nga kamiel sisarow pa osuw, ko murru kami piviseni ko wor nanu ngok. Sete erres nga kaploli nivelen sisarow se kami pitawi ore kele murrun nga m̄isij, ko kaplik ma pirpe demij maur se Atua. ¹⁷ Kaposuri jinibb p̄etp̄eti nir p̄irres. Kapmerreni lenglengen jinibb nga marivi kalesia nir. Ko kaposuri Atua p̄irres, ko kaposuri p̄irres batbatu numal gavman se kami.

Norongen nga m̄isij se Kristo eviseni sel tevi kerr

¹⁸ Jinibb ne majingen nir, kaposuri p̄irres numal se kami nir, ko tetajer kaptorir p̄irres. Kaploli pipok sete tevi kis nir nga marres ko marok-rrorrm̄i kami, ko tevi kele wor nir nga markoni lokloksi kami. ¹⁹⁻²⁰ Poro kaploli p̄isij, ko parvirrali kami suri, ko kaploli nolo kami pipriv nga kaptori nekaien ngok. Ngok sete evi nanu san, suri kami kobbong kamrevei nekaien ngok. Ko poro ma kampal ko sete suri sev nga kami kamloli, ko kapkulu van ji Atua ko pa, ko ngok merrenien nga milep se Atua piptevi kami vajin. ²¹ Ngok evi murrun san nga Atua miveruse kami nga kaplai, suri Kristo ornge esij rengen niben nga piwilwil se kami, ko eviseni murrun ngok tevi kami nga kami kapvivotu kele suri rengen bbötun ngok. ²² Ko Naul On owra ‘Sete ololi nanu san esij, ko sete nale gerisen san eplari

renge jingon.’ ²³ Sete erij weli nale nga m̄isij san tevi jinibb san. Daron nga marloli murnge m̄isij renge niben, ko sete orrorrmi nga p̄ikle lweni tevi nir. Ni elngi norrorrmien sen oto eterter renge Atua nga mok-wer sesesre lat nga puto suri tevi jinibb nir renge murrun nga musorsan. ²⁴ Daron nga Kristo mian re nai pelaot, ko owosi nololien se kerr renge niben. Ololi erpok nga kerr rrapmij renge murrun nga rramloli m̄isij, ko rrapa-maur renge murrun nga rramloli musorsan. Renge niben nga mimabbur renge nai pelaot, ololi kerr rramterter luwi kele vajin. ²⁵ Tuwi rramirpe sipsip nga martor jabble pa sel osuw, ko lelingenok rramluwi vajin vini ji Kristo, erpe jinibb nga mok-metmet vajin sipsip, erpe jinibb mawos vajin nga mok-metmete mauren se kerr.

3

Murrun ne totkoien

¹ Renge murrun ngok kele, kami nesevin, kaposuri ko wor diwen se kami. Ko poro diwen se kami sete parosuri Atua, ko murru kami kobbong orongwos pirvei nir vini nga parosuri, nga san sete mia-werai nanu san tevi nir, ² suri nir para-lesi meter e erpese kami kamlingi nosurien se kami tevi mauren nga musorsan m̄irres se kami renge Atua. ³ Ko sete erres nga kapkowkowri kami, nga kapviri batu kami, ko kapweni nasum nga marer nir ko sunsun nga marmerr nir, ko kapiel ngolngoli bela kami re mete jinibb nir. ⁴ Erres ma nga kaploli norrorrmien se kami pusorsan re no

Atua. Erres ma nga demat puto renge nolo kami, ko kapivi nesevin nga nolo kami pian ngatan. Ko murrun nga mumolmol ngok pivi nanu san nga puto tetajer ko ãirres temijpal kele renge mete Atua. ⁵ Ko nesevin ngok nir ne tuwi aron ko arwokwok erres re no Atua tevi norrorrmien ser nga mĩterter, ko arosuri diwen ser erres. Iok ko ololi nir arres kele renge mete diwen ser. ⁶ Sera kele ololi erpok. Osuri Epram ko everuse owra ‘Numal suk’. Poro kaploli murrun nga mĩrres ko sete kapmetutue nir nga sete marosuri, ko kami kapviter vajin nga parveruse kami natu Sera nir. ⁷ Ko renge murrun ngok kele, kami norman nga kamtotko, kaprrorrmĩ ko wor ãirres suri nesen se kami renge murru mauren ne martotko. Suri nir sete arterter erpe kami, ko rijrijen se Atua oto livö ne kamru kes, nga renge nolo Atua nga mĩrres, ni ãilai mauren tevi kamru. Ko ngok, kaposuri nesen se kami, puloli sete nanu san puto ore verusen se kamru.

Norrormien se kerr pivi ko wor sansan

⁸ Bevinvini ore nale suk. Kami kalesia jile, norrorrmien se kami pivi sansane, ko kaprrorrmĩ lululweni kami. Kapmerrmerreni lululweni kami pirpe niaken nir, ko nolo kami pian ngatan. ⁹ Daron nga jinibb muloli mĩsij tevi kami, ko sete kapkele lweni kele. Daron nga jinibb mĩrij mĩsij tevi kami, ko sete kapkele lweni kele, pijki. Kami kaplai lweni nale nga mĩrres tevi jinibb nga mirpok, suri daron nga Atua miveruse kami, ko ni emrreni ãirij ãirres tevi kami. ¹⁰ Naul On owra ‘Jinibb nga mimrreni

mauren nga m̄irres ko mimrreni purnge p̄irres tetajer setemun p̄ikerkeris. ¹¹ Ni p̄ilngi tweni sel nga m̄isij ko puloli murrun nga m̄irres; ko tetajer pipej mauren nga mumolmol ko p̄iplak ko wor p̄iterter nga putor sweri. ¹² Suri Numal Atua tetajer oklu van ji jinibb nga marsorsan nir ko ok-runge verusen ser, ko ok-sir duren tevi nir nga marloli m̄isij.’ ¹³ Poro kapok-loli murrun nga m̄irres ko sete san orongwose pulokloksi kami ren, ejki. ¹⁴ Ko poro daron sapon jinibb nir arloli kampal suri bbong kamloli murrun nga m̄irres, ko ngok kaprunge p̄irres kobbong. Ko sete kapmetutu, ko sete kaprrormi p̄elake nir. ¹⁵ Kaploli Kristo pivi Numal se kami, ko kaploli ni puwowomu re norrorrmien se kami. Ko kami kaptiriv tetajer nga kaplai lweni weli nale tevi jinibb san, poro san pususi tevi kami puwra “Suri sev kamtori Kristo renge norrorrmien se kami?” Ko kami kapviter nga kapwerai lweni weli nale tevi. ¹⁶ Ko kapjiljilwer tevir renge murrun nga mumolmol nga demat muto ren, ko tetajer kaploli murrun nga musorsan nga norrorrmien se kami sete p̄iwer lokloksi kami suri. Renge sel ngok puloli jinibb parmanun renge nale nga marsij nga marwerai, suri sel nga kamvijuri se Kristo evi pa sel nga mumomsawos m̄irres. ¹⁷ Ko erres kobbong nga parvirrali nik nga kumloli nanu nga m̄irres san, poro evi marongen se Atua. Ngok erresrres ma easi poro nga parvirralim suri nanu nga m̄isij nga kumloli.

Kristo emij pa suri kami

18 Kristo emij pa suri kami. Emij vesan kobbong ko sete mia-mij kele, nga p̄ilai tweni nololien se kami. Jinibb nga musorsan emij suri kami nga sete kamsorsan, nga p̄ilai lweni kami van ji Atua. Renge mauren sen iel ngatan, nir arevji pini; ko Atua ololi emaur luwi kele renge mauren nga mivi ne melrin. 19 Ko nem̄i Iesu evan ji nem̄in nga marlik renge naim ne nekaien ko ewerwer tevir. 20 Ngok lartul nga marong tweni Atua daron nga Noa m̄imajinge drrav sen. Ko Atua nolon epriv temijpal ko etriv nir, ko nir sete arosuri. Ko renge drrav ngok gortien nga welili san, erpe nir owil kobbong, nga Atua miwilwil se nir renge drrav se Noa daron nga muloli iel ngatan murr̄on ko jinibb jijle armij. 21 Nuwi ngok nga tuwi evi nelesien ne baptaes nga m̄ilai mauren tevi kerr lelingenok. Ko baptaes ngok sete evi nga pirrawe tweni nijorjor re nibe kami, ko evi nga rijrijen se kami tevi Atua sete orongwose p̄iwer lokloksi kami suri. Ko baptaes ngok evi nga putor sweri derteren nga p̄ilai mauren tevi kami, suri Atua ololi Iesu Kristo emaur luwi kele renge mijen. 22 Ko ean pa renge melrin e ko elik renge devjen rres ji Atua. Ko Atua ololi anglo tevi jinibb nga marlelep tevi numal nir ne melrin parsusi nisen pian mare.

4

Murru kami p̄inije ko wor

1 Daron nga Kristo m̄ilik iel ngatan, ko ornge esij renge niben. Ko renge iok, kami kele kaplai norrormien ngok nga puloli kapterter, suri nir

nga marunge m̃isij rengo niber setemun arloli nololien. ² Ko ngok, p̃itipatun lelingen, setemun kapmarong norrorrmien nga marsij parto ore kami. Ko kaplai ma nanu nga mivi se Atua puto ore kami. ³ Kamlokloksi daron elep pa womu nga kamloli sev nga jinibb ne vare nir marloli. Tuwi kamok-loli esij tevi nesevin, kamloli nanu nga m̃isij, ko kamok-minmin nga batu kami p̃ilengleng. Ko evter vajin re sel nga kamlot van ji atua m̃inij nir. ⁴ Jinibb ne vare nir artaol elep suri setemun kamkorti tevir rengo sel ser nga marsij, ko iok ko ololi marworwor suri kami ren. ⁵ Ko nir parwerau tweni mauren ser re no Atua nga m̃itriv nga p̃iwer suri lat nga puto suri tevi jinibb nga marmij ko jinibb nga marmaur. ⁶ Iok ko ololi nosp̃en nga m̃irres mian pa ji nir nga marmij osuw. Daron nga marmaur ko artor sweri nekaien ko armij sere, erpe jinibb jikle nir. Ko arwerwere nosp̃en nga m̃irres tevir nga puloli liken ne nem̃in nga m̃irres ser pirpe Atua.

Jinibb ne majingen nga m̃irres p̃elak se Atua

⁷ Rramini mori pa daron san nga nanu ne iel ngatan parjijki. Re iok kaploli lilane ko wor norrorrmien se kami pumolmol ko piñerer, ko kapok-lot ko wor. ⁸ Ko mare re nanu jikle, kapmerrmerreni lenglengen wor kami pilep, suri merrenien orongwose putor ore nololien pilep. ⁹ Tetajer naim se kami p̃itp̃ir nga neturvitan rrenga jinibb tama san p̃isil van loloim, nga sete nolo kami p̃isij suri kele. ¹⁰ Ko re Atua nolon nga m̃irres, elai derteren lele tevi kami nga kaploli majingen sen. Ko kaplai ko wor derteren ngok

nga piwilwil se kami. ¹¹ Poro kapok-werwer, kapwerai tweni ko wor nale se Atua. Ko poro kapwilwil se jinibb, ko kaploli ko wor re derteren nga Atua mīlai tevi kami. Ko renge murrun ngok nise Atua pian mare tevi nanu jikle nga marivi se Iesu Kristo, pianan pijpari tuwi ngok vini. Pirpok.

Kaprunge p̄isij daron sopen re nibe kami suri kamivi jinibb se Atua

¹² Selek nir, sete erres kaptaole nanu nga marsij nga marok-ini nga parrowrrowe kami, suri nanu ngok nir parok-pelari lululwi ko. ¹³ Ko erres nga kaprunge p̄irres erpe kamwilwil se Kristo renge norongen nga m̄isij sen. Ngok puloli kapwun saute neiren sen daron nga nalol nga m̄irres sen p̄irmali e. ¹⁴ Poro jinibb parij p̄isij tevi kami suri kamivi jinibb se Kristo, ko kaḡir, suri ngok eviseni nga Nem̄in ngok ne melrin nga mivi se Atua evini pa iel ngatan ji kami. ¹⁵ Ko jinibb nga ma mokrevji jinibb, rreknga mivevna, rreknga mutor otvi nale nesesreien, rreknga jinibb nga mieses nanu van re majingen se jinibb m̄inij nir, nir ko Atua pia-tor vitrangir suri. Ko sete erres nga kami san pipal suri murrun nga mirpok. ¹⁶ Ko poro kami san pipal suri bbong ni evi kalesia, sete pimanun, ko pusurövi ko wor Atua suri nise Kristo nga muto pa renge kami. ¹⁷ Ko daron evini nga Atua p̄itipatun nga p̄iwer suri lat nga puto suri tevi jinibb nir; ko womujnen ni puloli tevi jinibb sen nir. Ko poro p̄itipatun tevi kerr, ko ‘pia-irpese re nir nga sete marosuri nosḡen nga m̄irres se Atua?’ ¹⁸ Ko

nale se Atua owra ‘Porō ãiterter re Atua ãilai mauren tevi jinibb nga marres nir, ko nir nga sete marosuri ni ko arok-loli esij, rrek sel pijki rragrrag.’ ¹⁹ Ko ngok, nir nga Atua mimarong nga parunge ãisij rengo niber, parlingi ko wor mauren ser rengo nevre Atua nga rijrijen sen muto, ko parloli ko wor murrūn nga ãirres tetajer.

5

Nale tevi Elta nir

¹ Inu numrrēni ãelai nale san tevi kami elta nir. Inu kele nuvi elta san, ko nulesi Kristo tevi metek daron nga ni murnge ãisij rengo niben. Ko inu nutur eterter nga bokorti rengo mauren nga ãirres rengo melrin nga Kristo ãilai pia-rremali. Ko nuwrai eterter tevi kami nga ² kapmetmete ãirres nir nga Atua ãilair tevi kami, pirpe jinibb ne sipsip nga mok-metmete ãirres sipsip sen nir. Ko kaptor lilaner ãirres, ko nolo kami ãir suri majingen pirpe nga Atua mimrrēni. Ko sete erres nga kaploli suri bbong kammerreni nevöt pivitan ren. Ko kaploli majingen pirpe nga nolo kami purngo ãirres rengo. ³ Sete norrorrmien se kami pian mare ãelak tevi nir nga kammetmete nir, ko kapviseni ma sel nga musorsan ãirres tevi sipsip nir nga nir para-vivitu suri kami rengo. ⁴ Ko daron nga Kristo, Numal nga muwowomu re jinibb nir nga marmetmete sipsip nir ãirmali, ko kami kapator sweri nowli kami nga ãirres ãelak nga sete orongwose mia-sij nabong sopen.

⁵ Ko renge murrun ngok kele, kami m̃elakel, kaposuri ko wor nir nga martera. Nolo kami pian ngatan ko kapwilwil se lulweni kami, erpe Naul On muwra ‘Atua etre nir nga markowkowrire, ko ok-wilwil se nir nga nolor mian ngatan.’

⁶ Kaplingi kami van ngatan ji Atua nga derteren sen milep temijpal, ko ni pia-susi kami van mare re daron mawos sen nga ni kobbong m̃ilngi.

⁷ Kaplinglingi norrorrmien se kami nga muwlu p̃elak tevi ni, suri tetajer ok-rrorrmī kami.

⁸ Kaptur p̃iterter, ko kapmetmet. Devje nuval se kami, Demij, ok-wolu rrerrale kami erpe bae san nga numer m̃iaji milep, epejpej jinibb nga puwun totoklai.^B

⁹ Kaptur ore p̃iterter. Kamrongwose nga renge lat sapon iel ngatan, kerr sopor rrampal suri nise Kristo, osorsan erpe nga kami kamtor sweri. ¹⁰ Ko Atua ok-wilwil se kerr tetajer renge nalol nga m̃irres sen, ko everus kerr nga rrapan rrapkorti tevi Kristo renge mauren nga m̃irres p̃elak re melrin nga sete mia-suw nabong san. Kaprunge p̃isij beblen kobbong, ko vitunen Atua puloli kapterter, kapsorsan p̃irres, ko p̃ilai derteren tevi kami ko pususture kami pirpe duru nai san nga sete orongwose putoto.

¹¹ Ko loten suk, nga derteren jikle puto renge nevren ko pa pijpari tuwi ngok vini. Pirpok.

Bongsi nale se Pita

¹² Naul suk nga welili ngel, Silas oli tevi kami. Silas erpe kalesia tasi kerr nga inu mosuri.

B 5:8 Erpe iel, Pita orrongrongvi Demij erpe laeon, ko suri laeon ejki iel, namlingi bae, nga puloli mining ne nale se Pita piplari piñerer.

Numrreni bowrai tweni nga sel nga Atua mok-wilwil se kerr renga nalol nga m̃irres sen evi sel weretunen, ko kaptori p̃iterter. ¹³ Ko nir ne Naim On ne Bapilon^C nga Atua m̃ilngir arwera erres tevi kami. Ko natuk kele Mak owra erres tevi kami. ¹⁴ Kapwera erres tevi kami lululwi tevi merrenien ko demat. Ko ngel evi loten suk, nga demat puto tevi kami jikle nga kamivi jinibb se Kristo.

^C 5:13 Nais ngok Bapilon evi nale teptepi san, ko owra puwra Rom.

Naul On Nga Mimerr Uripiv
The New Testament in the Uripiv language of
Vanuatu

copyright © 1996 Wycliffe Bible Translators

Language: Uripiv (Uripiv-Wala-Rano-Atchin)

Dialect: Uripiv

Translation by: WBT

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 22 Nov 2019

96303ce7-aa0a-513c-862d-415957a542e1